



I làcrimi ri Cristu

vito blunda 2007

Doppu chi Pilatu si lavau li manu,
rèttiru a lu Signuri la sò cruci;
u pòpulu, ringraziannu lu Rumanu...
faccia gran festa e aisava la so vuci.

Cu iddru, c'eranu puru du latruna
e a genti, a tutti trè l'amminazzava,
stissa cunnanna, ma senza la curuna.
c'era, cu è chi chiancia e cu 'ngiuriava

Versu lu munti, stanchi caminaru,
tri voti cariu Cristu 'nta sta strata,
i pisa chi purtava lu stancaru...
a Vuluntà Divina: sintinziata.

Junti dra supra, 'nto mezzu 'u cullucaru
e ru cumpari, li mìsiru di latu;
tri chiova, manu e peri ci chiantaru...
comu si n'assassinu avissi statu.

Vivu l'aisaru e u sanghu ci sculava,
u pettu, pi sdilleggiu, ci spunnaru,
sò matri, addinucchiuni si dannava...
picchè 'stu figghiu bonu, l'ammazzaru.

Gesù, a sò Patri vosi addumannari,
chi un canuscennu la Gloria di li Celi,
si putia, 'sti 'gnurantuna pirdunari...
mentri di l'occhi, ci scinnia lu meli.